

Հարգելի՛ դասախոսներ, ուսանողներ, հյուրեր, ծնողներ, այսօր մեր երեխաների կյանքի ամենակարևոր և հիշարժան օրերից մեկն է։ Նրանք այսօր իսկապես ոտք են դնում մեծ կյանքի շեմին։ Գեղեցիկ այս օրը թևածում են բարեմաղթանքներն ու հարազատ ժպիտները՝ գալիքին անկեղծորեն հանդիպելու պատրաստակամությամբ։ Եվ թույլ տվեք ասել, որ նրանք իրենց ձեռք բերած գիտելիքներով միանգամայն պատրաստ են հասուն կյանքի ուղին սկսելու, և դրա երաշխիքը անշուշտ պատկանում է իրենց դասախոսներին, ովքեր ջանք չեն խնայել հարստացնելու նրանց գիտելիքների զինանոցը՝ լավ գիտակցելով, որ միայն կրթված և բազմակողմանի զարգացած անձինք են հասնում հաջողության։

Արվեստը բոլոր ժամանակներում և բոլոր հասարակություններում եղել է յուրահատուկ ներշնչանքի և ուշադրության առարկա։ Արվեստը մեր ընկալումներում երկնաշնորհ բան է, որին տիրապետելիս դառնում ես արարչագործ։ Այսուհանդերձ, այդ նույն արվեստն ունի այր-բեն-գիմ, որն արժե և պետք է սովորել, և որը սովորելու համար մեր երեխաները եկան այստեղ՝ այդ արվեստին աշակերտած մարդկանց մոտ։ Ինչպես գրել է մեծ մտածող Դրայդերը՝ արվեստը մեղր է՝ պահպանված մարդկային հոգիների միջոցով և հավաքված զրկանքների ու տքնանքների թևերով։

Բոլոր ծնողների անունից, հարգելի՛ դասախոսներ, շնորհակալություն եմ հայտնում ձեզ. դուք մեր երեխաների համար արել եք թերևս ավելին, քան ծնողները կարող էին անել։ Մաղթում եմ ձեզ բարձր տրամադրություն, հավատ՝ վաղվա լուսավոր օրվա հանդեպ։ Թո՛ղ արևը խոնարհվի ձեր ճանապարհին, երկինքը հարթեցնի իր ամպե կնճիռները, և ծիածանը լինի ուղեկիցը ձեր։ Շնորհակալություն, սիրելի՛ դասախոսներ, ձե՛զ մեր երախտագիտությունը, անսահման սերն ու նվիրվածությունը։

Ուզում եմ այսօր երկնքից արև,

Եվ մի ողջ գարուն ձեզ ընծա բերել,

Ուզում եմ այսօր ձեզ երազ ու սեր,

Աստղային ժպիտ ու կյանք պարզնել։

Թո՛ղ ես այսօր ձեզ բարին մաղթեմ,

Ծով երջանկությամբ ձեր կյանքը լցնեմ։

Լինեք երջանիկ և այնքան բարի,

Որ ձեզնով վառվեն լույսերն աշխարհի։